

TATA PANGIBADAH MINGGU EPIFANI KAPING PITU - GKJ AMBARRUKMA 16 Februari 2025

Gedung Induk Papringan, jam 08.00 WIB

(Warni Liturgis: Ijem, Stola/Logo/Simbol : Bintang Bersegi Gangsal)

1. **Pacawisan** : Imam mimpin pandonga ing konsistori
2. **Liturgos** :

Sakderengipun pangibadah kawiwitan, Liturgos nyumet 1 (satunggal) lilin pethak ibadah.

“Pasamuwan kinasih kagunganipun Gusti Yesus Kristus, Pradataning Pasamuwan ngaturaken sugeng rawuh, sugeng enjang, lan sugeng pepanggihan malih wonten ing pangibadah **Minggu, Enem Belas Februari Kalih Ewu Selangkung (Selawe)** (16 Februari 2025).

Kita aturaken uluk salam kabingahan kita sami kanthi jawat-asta utawi salam namaste kagem pasamuwan ing sakiwa tengen, ngajeng, saha wingking panjenengan. Mugi berkah kasarasan lan karaharjan tansah nunggil wonten ing Bapak, Ibu, saha para Sedherek, tuwin Lare-lare sadaya.

Kula nyuwun kawigatosanipun sawetawis, awit wontenipun pawartos Minggu menika, ingkang badhé kula aturaken sapérangan (*maosaken pawartos*).

Jangkeping pawartos saged kawaos lumantar pawartos *online* ingkang saged dipun undhuh mawi *QR code* ingkang sampun kacawisaken wonten ing layar monitor, punapa ingkang sampun kacawisaken wonten grup Whatsapp, menapa déné lumantar iber-iber cetak ingkang kacawisaken wonten ing kori greja.

Pasamuwan ingkang dipun kasihi dening Gusti, pangibadah wekdal punika kanthi irah-irahan ”**Binerkahana Tiyang ingkang Kumandel Maring Gusti**” badhe kaladosaken dening Bapa Pandhita Emeritus Sulendra Partaatmadja.

Sumangga kita puji asmanipun Gusti kanthi repening kidung pambuka **Kidung Pasamuwan Jawi Pitu, pada Setunggal lan Kalih (KPJ 7 : 1 + 2), “Gusti, Kawula Sowan”** *pasamuwan kasuwun jumeneng*

(1) Gusti, kawula sowan atur pangabekti,
pasrah nyawa lan badan kanthi trusing ati.
Mugi Paduka tampi, wah paring kadamnan,
dimen kula lestantun wonten ing kraharjan.

(2) Kawula sèstu ngudi manut rèhing Gusti,
nanging ringkihing budi tansah memalangi.
Dhuh Gusti, mugi rawuh, mulunga ing asta,
dadya gondhèlan bakuh, kula tan suwala.

(Kidung kawiwitan, Imam lan Pengkhotbah lumebet dhumateng altar, Imam ngaturaken Kitab Suci dhumateng Pengkhotbah, sakderengipun Pengkhotbah mapan dhateng mimbar.)

3. **Votum tuwin Salam Karaharjan:** *(Pasamuwan Jumeneng)*

Pandhita : Pasamuwan kinasih, sumangga ing pangibadah dinten Minggu punika kita sesarengan mratelakaken pangaken konjuk Gusti ingkang mekaten:

Sadaya : **Pitulungan kita punika pinangkanipun saking Sang Yehuwah ingkang nitahaken langit lan bumi, tuwin ingkang mboten nate nilaraken pakaryaning Astanipun.**

Pandhita : Sih rahmad lan tentrem rahayu saking Sang Yehuwah Gusti kita, tuwin Gusti Yesus wonten ing bapak, ibu, lan sadherek sadaya.

Pasamuwan : **Mekaten ugi ing panjenengan.**

Sadaya : **5 7 i . / 5 7 i . / 5 4 3 . /**
Amin, Amin, Amin.

(Liturgos: *Pasamuwan kula aturi lenggah.....*)

4. **Lektor : Sabda Introitus : Jabur 1** *(macapat)*

Lektor : “Mekaten sabdanipun Gusti”

Pasamuwan : “Puji sokur konjuk Gusti”

5. **Liturgos :** “Pasamuwan kagunganipun Gusti Yesus, Sabdanipun Gusti ngengetaken bilih Allah kita ingkang Gustining sarwa tumitah, ing saindenging bumi menika kebak ing kamulyan sarta langgeng salami-laminipun.

Sumangga sesarengan kita repenaken kidung sukarena, **Kidung Pasamuwan Jawi Tiga Likur, pada Satunggal lan Tiga (KPJ 23 : 1 + 3), “Puji Mring Allah”**

(1) Puji mring Allah, Pangeran Kang Mahawisesa.
Muji ramya, binarung lan sawernining gangsa.
Pangidungnya klayan bingah ing manah, nggunggung Gustining pratitah.

(3) Puji mring Allah kang sung tentrem-raharja nyata.
tansah ngganjar begja mring tyang kang sèstu pracaya.
dadya dilah, andel-andel satuhu. Pujinen lan trusing kalbu!

6. **Pandhita : Sabda Andharaning Katresnan (Mulad Sarira) : Jabur 139 : 23 - 24**

7. **Imam : Pacawisan Pamratobat**

”Pasamuwan ingkang dipun tresnasi Gusti, Bapa kita matrapi kita miturut menapa ingkang kaanggep murih kabecikanipun kita sami, supados kita kapanduman kasucen saha ngedalaken wohing kayekten ingkang nuwuhaken raos tentrem.

Sesarengan kita badhe nyawisaken manah, murwakani pandonga pamratobat, kanthi memuji **Kidung Pasamuwan Jawi Seket Satunggal, pada Satunggal lan Kalih (KPJ 51 : 1 + 2), “Gusti Mugi Mirsani”**

- (1) Gusti mugè mirsani nggen kula kesrakatan.
Kula mlajeng mring pundi, namung dhateng Pangeran.
Nyuwun tulung, dhuh Allah mugè nglanting kawula
sing sagung karibedan, dimenpulih lejara.
- (2) Tan wonten pangauban, sèstu namung Paduka,
etuking pitulungan tumrap tyang kang nalangsa.
Yèn kegunturan sedhik miwah nandhang sangsara.
sinten kang nglipur malih, inggih namung Paduka.

8. Imam: Pandonga Pamratobat

Pasamuwan ingkang sampun dipun tunggil ing padalemanipun Gusti, sesarengan kita aturaken pandonga pamratobat, kita ndedonga:

“Pinuji asma Paduka Gusti. Allah Rama kawula, puji panuwun sokur konjuk dumateng Paduka, awit sih piwelas Paduka, Paduka mboten negakaken kawula. Kepara Paduka matrapi kawula kangge kesaenan kawula. Ing pangibadah menika Gusti, kawula nelangsani dosa-dosa kawula. Pramila Gusti, nyuwun piwelas saha nyuwun sih kamirahan Paduka. Paduka Gusti paring pangaksama dumateng sadaya karingkahan lan jempering dosa kawula punika. Nyuwun panganthi saha pepadhang saking Sang Roh Suci dados panunthun ing sak uruting lampah gesang kawula. Kamirahan ing sih katresnan saking Paduka tansah nyarengi ing gesang kawula. Linambaran sih katresnanipun, Gusti Yesus Kristus Juru Wilujeng, kawula ndedonga. Amin.”

9. Pandhita : Pawartos Sih-Rahmat : Jabur 115 : 12 - 13

Pandhita : Pangatag-atag Gesang Anyar : Jabur 130 : 7

10. Liturgos : “Pasamuwan kagunganipun Gusti. Gusti kita Yesus Kristus menika badhe ngutus kita sami, pramila kita saget ngaturaken wangsulan: Sumangga Gusti, mugè Paduka karsa ngutus kawula!

Awit saking menika, sesarengan kita badhe ngrepekaken **Kidung Pasamuwan Kristen Suwidak Satunggal, pada Satunggal lan Kalih (KPK 61 : 1 + 2), “Allah Yeku Pangen Satuhu”..... *pasamuwan kula aturi jumeneng***

- (1) Allah yeku pangen satuhu pangrehnya nentremken kalbu
kula tansah rinimatan srana sagung ing kamirahan.

Refr: Ing juranging pati tan wedi bilai wit Gusti pribadi kang nganthi
nadyan mengsah kathah manah datan semplah berkah tansah rumentah
mung kabegjan saha kadarman ngiring salaminé gesang
sarta kula badhe manggen tansah ing daleme Sang Yehuwah.

- (2) Ayem manah lan nyawa kula ingayom ing sihing Gusti,
sarta tinuntun astanya ing margining bebener yekti.....Refr:

(Liturgos : *Pasamuwan kula aturi lenggah.....*)

11. Wedharing Sabdanipun Gusti

(*Pasamuwan Lenggah*)

a) Pandhita : Pandonga Epiklese

b) Pandhita : maosaken Yeremia 17 : 5 - 10

c) Pandhita : **Rahayu saben tiyang ingkang mirengaken sabdanipun Gusti lan nindhakaken karsanipun Gusti ing gesang padintenan. Haleluya.**

Pasamuwan: 1 1 | 3 3 0 3 3 | 5 5 0 5 5 | 6.543 |

Hale - luya Hale - luya Hale - lu - ya

d) Pandhita : Paladosan Khotbah

e) Irah-irahan: **“Binerkahana Tiyang ingkang Kumandel Maring Gusti”**

f) Ancas : **Pasamuwan dipun ajak tansah kumandel maring Gusti ing sadengah perkawis gesangipun mboten ngendelaken kekiyatan diri pribadi matemah ndadosken pasamuwan ingkang tansah binerkahan dening Gusti.**

g) Wekdal Ening.

12. Pisungsung

Imam : “Pasamuwan ingkang dipun kanthi Gusti, berkahipun Gusti tansah kababar ing gesang kita sami. Awit saking menika, kita badhe nyaosaken pisungsung dumateng Gusti minangka cihnaning raos sokur kita.

Pisungsung wekdal menika kapantha dados tigang kanthong, kanthong setunggal kagem pasamuwan, kanthong kalih kagem kesaksian pelayanan, lan kanthong tiga kagem panyengkuyung dana griya éméritus. Pisungsung mirunggan **Caos Sokur Ambal Warsa Kaping 94 Sinode GKJ** saged dipun lebetaken ing kotak ingkang sampun kacawisaken.

Lan ingkang ngersakaken caos pisungsung kanthi migunakaken aplikasi m-banking, sumangga saged mawi scan kode QRIS ingkang sampun cumawis, katèmpèl wonten palenggahan.

Tetales pisungsung ing wekdal punika, kapethik saking kitab **Jabur Bab Sekawan Dasa Kalih Ayat Sewelas (Jabur 42 : 11 (12))** ingkang mekaten suraosipun:

”Dhuh nyawaku, yagene kok tumungkul? Yagene kok ngolang-ngaling ana ing jeroku? Ngarep-arepa marang Gusti Allah! Awit Panjenengane dakpuji maneh, Panjenengane kang dadi Pitulunganku lan Allahku!”

Kita aturaken pisungsung wonten ngarsanipun Gusti, kanthi repening pepujen **Kidung Pasamuwan Kristen Satus Wolung Dasa Gangsal, pada Setunggal dumugi Tiga (KPK 185 : 1 – 3), “Pisungsung Konjuk Mring Allah”**

- (1) Konjuk mring Kang Maha agung kawula sung pisungsung
cihnaning bingahing manah wit berkahing Allah
sumengka wah sinengkera lan temen rineksa
dadya srana munpangati mrih kamulyaning Gusti.
- (2) Konjuk Allah kang Maluhur kawula saos sokur,
kebabaring raos urmat wit tansah rinimat,
dalah gesang kula mugè kagem dening Gusti,
dadya lantaraning berkah tumraha mring tyang kathah.
- (3) Konjuk ing ngarsaning Allah kawula sung panrimah,
tandha ajrih asih kula wit gung sih rahmatnya,
mugi Gusti nggih karenan temah binerkahan
dadya margi Kratoning Allah binabar neng bumi.

13. Pandhita : Pandonga Syukur lan Syafaat

14. **Liturgos** : “Bapak, Ibu, lan Sedhèrèk kinasih ing Gusti Yesus Kristus, sumangga sesarengan kaliyan tiyang pitados ing pundi-pundi papan, kita sami nélakaken **Pangaken Pitados Rasuli**. Pasamuwan kula aturi jumeneng

- Kawula pitados dhateng Allah Sang Rama, ingkang Mahakawasa, ingkang nitahaken langit kaliyan bumi.
- Inggih pitados dhateng Yesus Kristus ingkang Putra ontang-anting, Gusti kawula.
- Inggih kabobotaken dening Roh Suci, miyos saking prawan Maryam.
- Inggih nandhang sangsara nalika jumenengipun Pontius Pilatus, kasalib, nglampahi seda, lajeng kasarekaken, tumedhak dhateng ing teleng palimengan.
- Ing tigang dintenipun wungu malih saking antawisipun tiyang pejah.
- Lajeng sumengka dhateng ing swarga, pinarak wonten ing tengenipun Allah Sang Rama ingkang mahakawasa,
- Saking ngriku inggih badhe rawuhipun ngadili tiyang ingkang gesang kaliyan ingkang pejah.
- Kawula pitados dhateng Roh Suci.
- Kawula pitados wontenipun pasamuwan Kristen satunggal ingkang suci sarta wradin, inggih patunggilanipun para suci.
- Punapa-dene pangapunte ning dosa.
- Tanginipun raga.
- Sarta gesang langgeng.

15. Pandhita : Paladosan Berkah

16. **Liturgos** : “Pradataning Pasamuwan ngaturaken panuwun awit peladosanipun Bapa Pandhita Emeritus Sulendra Partaatmadja lan sadaya paraga ingkang sampun nyengkuyung lampahing pangibadah, ugi pasamuwan ingkang rawuh lan nderek ing pangibadah punika.

Sesarengan kita pungkasi pangibadah punika kanthi repening **Kidung Pasamuwan Jawi Sekawan Atus Tigang Dasa Setunggal, pada Setunggal lan Kalih (KPJ 431 : 1 + 2), “Gusti Adhawuh”**

- | | | | |
|-----|---|-----|--|
| (1) | Gusti adhawuh yèn kita sami
kinèn kadya lilin kang amadhangi,
supaya saben wong padhang ing ati,
wah angluhuraké Hyang Masuci. | (2) | Saka suwarga Gusti mirsani
ngendi lilin kang bentèr lan kang mati.
Gusti ya mirsa, apa kita iki
urip kadya lilin kang madhangi. |
|-----|---|-----|--|

17. **Liturgos** : “Mekaten pangibadah ing enjang menika sampun paripurna. Sugeng dinten Minggu, sugeng kondur mugè katentreman lan karaharjan tansah nunggil ing kita sami.”